

# Mga Saksi

## Saksi #1

### Ang mga pulong sa Ginoo

Si Joseph Smith gimandoan nga dili ipakita ang bulawan nga mga palid ngadto sa kalibotan (tan-awa sa Doktrina ug mga Pakigsaad 5:3). Basaha ang Doktrina ug mga Pakigsaad 5:6–10, mangita sa unsay gitugot kang Joseph nga ipakigbahin.

Mahimo nimong markahan ang hugpong sa mga pulong nga gisubli sa Ginoo diha sa mga bersikulo 5, 6, ug 7.

- Ngano sa imong hunahuna nga ang Ginoo mas nabalaka mahitungod sa atong pagtuo ug pagpatalinghog sa Iyang mga pulong diha sa Basahon ni Mormon kay sa Siya nabalaka mahitungod sa atong pagkasayod nga ang mga palid anaa?

Nagpasabot sa Basahon ni Mormon, si Presidente Gordon B. Hinckley (1910–2008) mitudlo:



Ang ebidensiya sa kamatuoran niini, alang sa pagkabalido niini sa usa ka kalibotan nga daling mangayo og ebidensiya, wala sa arkeyolohiya o sa antropolohiya, bisan kon kini makatabang sa pipila. Wala kini sa pagpanukiduki sa pulong o pagtuki sa kasaysayan, bisan kon kini mahimong komfirmasyon. . . . Ang pagsulay sa kamatuoran niini anaa sa pagbasa niini. Kini usa ka basahon sa Dios. (Gordon B. Hinckley, "Four Cornerstones of Faith," *Ensign*, Feb. 2004, 6)

Paggahin og pipila ka minuto sa pagpamalandong sa imong kasinatian sa pagtuon ug sa pagkanatudloan gikan sa Basahon ni Mormon. Hunahunaa kon sa unsang paagi ang imong pagtuon nakaapekto sa imong kinabuhi. Mahimo nimong irekord ang pipila sa imong mga hunahuna diha sa imong journal.

## Saksi #2

### Ang pagpamatuod sa tulo ka mga saksi

Basaha ang Doktrina ug mga Pakigsaad 5:11–15, mangita kon si kinsa ang tugotan sa Ginoo nga makakita sa mga palid.

- Unsa ang imong nakita niini nga mga bersikulo nga makapahimo sa mga pagpamatuod sa Tulo ka mga Saksi nga gamhanan?

Sa wala madugay, si Martin Harris, Oliver Cowdery, ug David Whitmer nakakita sa bulawan nga mga palid ug nagpamatuod sa katinuod niini. Makakat-on ka og dugang pa mahitungod niini nga panghitabo sa higayon nga magtuon ka sa Doktrina ug mga Pakigsaad 17.

Nagpasabot sa Tulo ka mga Saksi, si Presidente Dallin H. Oaks sa Unang Kapangulohan mitudlo:



Ang ilang pagpamatuod wala gisupak sa uban pang mga saksi. Mahimong isalikway kini sa usa ka tawo, apan unsaon pagpasabot nga ang tulo ka mga tawo nga adunay maayo nga kinaiya naghiusa ug nagpadayon niining gimantala nga pagpamatuod hangtod sa katapusan sa ilang mga kinabuhi nga nag-atubang og dakong pagbiaybiay ug uban pang personal nga kadaot? Sama sa Basahon ni Mormon mismo, walay mas maayo nga pagpasabot kaysa sa gihatag diha sa pagpamatuod mismo, ang ligdong nga pamahayag sa maayo ug matinuoron nga mga tawo kinsa misulti sa unsay ilang nakita. (Dallin H. Oaks, "The Witness: Martin

Harris," *Liahona*, Mayo 1999, 36)

Ikonsiderar ang pagbasa sa “Ang Pagpamatuod Sa Tulo Ka Mga Saksi” anaa sa sinugdanan sa Basahon ni Mormon o paghimo og lista sa mga tawo kinsa mipamatuod diha kanimo nga ang Basahon ni Mormon tinuod. Hunahunaa kon sa unsang paagi ang ilang pagpamatuod nakapalig-on sa imohang pagpamatuod.

### Saksi #3

#### Ang Espiritu Santo

Basaha ang Doktrina ug mga Pakigsaad 5:16 ug ang Moroni 10:4–5. Ilha kon giunsa pagpadayag sa Dios ang katinuod sa Basahon ni Mormon ngadto sa Iyang mga anak.

- Unsa ang pipila ka mga paagi nga ang Espiritu mahimong magpamatuod ngadto sa usa ka tawo sa katinuod sa Basahon ni Mormon?

Si Glenn L. Pace, kinsa nag-alagad isip Presiding Bishop, miingon:



Walay laing paagi sa pag-angkon og pagpamatuod kondili pinaagi sa pagsaksi sa Espiritu Santo. Wala na kay laing masaligan. . . . Daghan kita og mga ehemplo sa kasulatan kon unsa ka walay pulos ang pisikal nga pagpakita nga walay kauban ngapagdawat sa pagsaksi sa Espiritu Santo. Ang pagkakabig dili moabot pinaagi sa pisikal nga mga pagpakita gikan sa langit. (Glenn L. Pace, “The Elusive Balance,” *New Era*, Mar. 1989, 49)

Paghimo og lista sa mga rason kon nganong sa imong hunahuna ang pagsaksi gikan sa Espiritu Santo, usa ka miyembro sa Dios nga Kapangulohan, mas importante kay sa pisikal nga ebidensiya nga ang usa ka butang tinuod. Ikonsiderar ang paglakip sa bisan unsang mga saksi nga imong gibati nga imong nadawat pinaagi sa Espiritu Santo nga ang Basahon ni Mormon tinuod.